

## ზამთრის ბარელიეფი

საღამო, კანკალი სანთლის,  
ორგვლივ დაწოლილი ნისლი.  
ფარული წამების ლანდი,  
პოეტის ცრემლი და სისხლი.

არ არის ტირილის გარდა  
სულისთვის ნუგეში სრული.  
შეირხა სიმწარის ფარდა  
და ტყეში გაფრინდა გული

გაიხსნა ვედრების რკალი,  
(ზამთარი სიცოცხლეს მართმევს).  
ქალაქის ფერმკრთალი ქალი  
სარკესთან შეკრთება სადმე.

დამტოვე სურვილი ბევრი,  
(ქარია და ზარი კივის).  
ციმციმებს სიკვდილის ფერი,  
დაეშვა დღეები ცივი.

საღამო, კანკალი სანთლის,  
ორგვლივ დაწოლილი ნისლი  
ფარული წამების ლანდი,  
პოეტის ცრემლი და სისხლი.